

Uunga siunnersuut: Sanaartornermi neqerooruteqartitsisarneq pillugu Inatsisartut inatsisaat nr. xx, yy 2008-meersoq

Kapitali 1
Atuuffia

§ 1. Sanaartugassat suliarineqarnissaannut, imaluunniit sanaartugassat pilersaarutitalerlugit suliarineqarnissaannut neqerooruteqartitsisarnermut, aammalu suliaakkiissutinik tunniussisarnermut inatsit atuuttuuvoq.

Imm. 2. Neqerooruteqartitsisartunut ukununga inatsit atuuttuuvoq:

- 1) Namminersornerullutik Oqartussat, ingerlatseqatigiiffiit Namminersornerullutik Oqartus-sanit aalajangiisarnikkut sunniuteqarfigisinnaasaat kiisalu kommunini oqartussaasut,
- 2) neqerooruteqartitsisut allat, pisortanit tapiiffigineqarlutik sanaartugassanik neqerooruteqartitsisut, tassungalu qularnaveeqqusiissutit ilaapput.

Imm. 3. Inatsit ukununga atuutinngilaq:

- 1) Piginneqatigiilluni inissiat, sanatitsisunit namminersortunit sananeqartut aningaasalersorneqartullu, tamatumalu kingorna piginneqatigiilluni inissiaatillit peqatigiiffiannut tunniunneqartut.
- 2) Namminersorluni inissialiat, Inatsisartut inatsisaannut oqaaseqaatit naapertorlugit taarsigassarsititsinissamik neriorsuuteqarfiusut.

Imm. 4. Sanaartornermi suliaakkiissutissap tunniunneqarnerani inatsit imaluunniit tassani maleruagassat tunngavissatut atuutissasut neqerooruteqartitsisup ersarissumik nalunaarutigisimappagu, neqerooruteqartitsinermi suliaakkiissumillu tunniussinermi suleriaasissamut inatsimmi maleruagassat aammattaaq atuutissapput.

Nassuiaatit

§ 2. Sanaartornertut paasineqassaaq, sanaartugassat ataatsimoortut imminermi aningaasqarnikkut imaluunniit teknikkikkut naammassisinnaasussatut aalajangerneqartut inerneratut.

§ 3. Inatsimmi matumani suliariumannittussarsiuussinertut paasineqassaaq, suliaassap neqeroortitsivigineqarnerani arlalinnut piffissap aalajangersimasup ataatsip iluani, aammalu neqerooruteqartitsinermi tunngavissat assigiit, imaluunniit atuuttussamik neqerooruteqarnissamut piumasaqaatit minnerpaaffissaat ataatsimoortut, imaluunniit sanaartugassaq pillugu suleqatigiinnissamik pisussaaffiliisumik neqerooruteqarnissaq tunngavigalugit neqerooruteqartitsiner-tut.

Imm. 2. Tamanut ammasumik suliariumannittussarsiuussinermi tusagassiuutitigut naqititigut imaluunniit elektronik atorlugu tusagassiuutitigut allagarsiinikkut kikkunnulluunniit neqerooruteqarnissamut kajumissaarisooqassaaq.

Imm. 3. Killilimmik suliariumannittussarsiuussinermi toqqaannartumik, imaluunniit neqeroortikkusutat kisiisa saaffigalugit neqerooruteqarnissamut kajumissaarisooqassaaq.

§ 4. Siullermeerutaasumik neqerooruteqartitsiner-tut paasineqassaaq, neqerooruteqartitsisup toqqaanissamut tunngavissat ataatsimoortut tunngavigalugit neqerooruteqartunik, sanaartugassanut neqeroortikkusutanik toqqaaneratut.

§ 5. Sinaakutissatut isumaqatigiissutit paasineqassaaq, assersuutigalugu piffissaliussap iluani sanaartugassat assinganut sananeqarsinnaasunut akit, pitsaassutsit amerlassutsillu, imaluunniit annertussutsit eqqarsaatigalugit piumasaqaatinik isumaqatigiissusiorfiusutut.

§ 6. Neqeroorutit suliariumannittussarsiuussinikkut imaluunniit sinaakktissatut isumaqati-giissusiornikkut pissarsiarineqarsimannigitsut tassaapput suliaqartinniakkat ilisimatereerlugit neqerooruteqartitsinerit.

Kapitali 2

Neqerooruteqartitsinermi pissutsit tunngaviusut

Unammilleqatigiinneq assigiimmillu pineqarnissaq

§ 7. Sanaartugassanik inatsimmi matumani ilaatinneqartunik suliaqarnissamut, imaluunniit pilersarusiornissamut suliaqarnissamullu neqeroorutit tamanut ammasumik suliariumannittussarsiuussinikkut, imaluunniit killilimmik suliariumannittussarsiuussinikkut, suliaqartinniakkalluunniit ilisimateerlugit neqerooruteqartitsinerit pissarsiarineqassapput.

Imm. 2. Neqerooruteqartitsisup naammaginartumik unammillersinnaalernissamut periarfissat atorluassavai.

Imm. 3. Neqerooruteqartitsisoq neqerooruteqartitsinissamik piareersaanermi ingerlatsinermilu, aammalu suliaqarnissamut tunniussinermi pisussaavoq, neqerooruteqartumik toqqaanermi kinaassusersiunngitsumik, piviusorsortumik immikkoortitsiviunngitsumillu tunngaveqarnissaq, aammalu neqerooruteqartut akornanni assigiinngisitsisoqannginnissaa isumagissallugu.

Neqerooruteqarnissamut uppersaanissamullu piffissarititaasut

§ 8. Neqeroorutit tiguneqarsimanissaanut piffissarititaasoq neqerooruteqartitsinermi najoq-qutassani allassimassaaq. Neqerooruteqartussaq neqerooruteqarnissamut naammaginartumik piffissaqarsinnaasunngorlugu piffissarititaasoq sivisussusilerneqassaaq.

Imm. 2. Uppersaanissamut piffissarititaasoq ullunik suliffiusunik 20-nik sivisussuseqartinneqassaaq, neqerooruteqartitsinermit najoq-qutassani allamik allassimassooqanngippat.

Imm. 3. § 17 naapertorlugu suliariumannittussarsiuussinermi neqerooruteqartunut isumaqatiginninniarnermi, neqerooruteqartoq isumaqatiginninniarnissamut qaaqquneqanngitsoq imaluunniit isumaqatiginninniarnert ingerlanerini peersinneqartoq, aalajangiingerup neqerooruteqartumut nalunaarutigineqarnerani erngerluni neqeroorumminut qilersorsimajunnaassaaq.

Kapitali 3

Suliariumannittussarsiuussinermi periaaseq

Neqeroorutip ilusissaa

§ 9. Suliariumannittussarsiuussinermi neqeroorutit allagaassapput. Neqeroorut atorlut elektroniskiusut atorlugit tunniunneqarsinnaapput, neqerooruteqartitsisoq siumoortumik taamaattoqannginnissaanik piumasaqarsimannigippat.

Tamanut ammasumik killilimmillu suliariumannittussarsiuussinissamik piareersaarneq

§ 10. Tamanut ammasumik suliariumannittussarsiuussinermi neqerooruteqartitsisoq teknikkikkut aningaasaqarnikkullu pisinnaasat, neqerooruteqartup neqeroorummik naammassinnissinnaasutut piukkunneqassaguni pigisassatut uppersaanissagassai pillugit paasissutissanik piu-

masaqarpat, paasisutissat uppersaatillu taakku suussanersut allagarsiussami allassimasapput. Aammattaaq suliassaq akikinnermik neqerooruteqartumut, imaluunniit aningaasaqarnikkut iluanaarnarnerpaamik neqerooruteqartumut tunniunneqassanersoq allagarsiussami allassimassaaq.

§ 11. Killilimmik suliariumannittussarsiuussinermi neqerooruteqartitsisoq tusagassiuutit naqitat imaluunniit elektronik atorlugu tusagassiuutit aqutigalugit neqerooruteqartitsinissamut allagarsiussamik tamanut ammasumik saqqummiussilluni neqerooruteqarsinnaasunut pilerisaaruteqarnermigut siullermeerutaasumik neqerooruteqartitsisinnaavoq. Neqerooruteqartitsinissamut allagarsiussami allassimasussaapput

- 1) peqataanissamut soqutiginnilluni nalunaarnissamut piffissaliussaq, sivikinnerpaamik ullunik suliffiusunik 15-inik sivilissuseqartussaq,
- 2) aningaasaqarnikkut teknikkikkullu pisinnaasat pillugit paasisutissat, siullermeerutaasumik neqerooruteqartitsinermut ilaanissamut uppersarneqartussat suussusissaat, taakkunungaluppersaatissat,
- 3) suliassaq akikinnerusumik akeqartitsilluni imaluunniit aningaasaqarnikkut iluanaarnarnerpaamik neqerooruteqartumut tunniunneqassanersoq, aamma
- 4) neqerooruteqartut neqerooruteqarnissamut kajumissaarneqartussat amerlanerpaamik qassiunissaat.

§ 12. Siullermeerutaasumik neqerooruteqartitsinertaqanngitsumik killilimmik neqerooruteqarnissamut kajumissarinermi, neqerooruteqartut neqerooruteqarnissamut kajumissaarneqartussat amerlanerpaamik qassiussanersut neqerooruteqartitsisup ilisimatitsissutigissavaa. Kajumissaarummi suliassaq akikinnermik neqerooruteqartumut, imaluunniit aningaasaqarnikkut iluanaarnarnerpaamik neqerooruteqartumut tunniunneqassasoq allassimassaaq.

Suliariumannittussarsiuussinermi neqeroorutit ammarneqarnerini najuussinnaatitaaneq

§ 13. Suliariumannittussarsiuussinermi neqeroorutit sumiiffimmi suliariumannittussarsiuus-siffiusumi piffissami siumut aalajangeriikkami ammarneqassapput. Neqerooruteqartut neqeroorutit ammarneqarnerini najuunnissamut, aammalu neqeroorutaasa annertussusaannik nalornissutaasimasinnaasunillu paasisaqarnissamut pisinnaatitaapput.

Tunniussinissamut tunngavissat

§ 14. Neqerooruteqartitsisup suliariumannittussarsiuussinissaq taamaatinngippagu, suliassaq ukuninnga tunngaveqarluni tunniunneqassaaq:

- 1) appasinnerpaamik akeqartitsisumut, imaluunniit
- 2) tunngavissat assigiinngitsut, soorlu akit, inuiaqatigiit aningaasaqarneranni eqqarsaatigissasat, pitsaassuseq, piffissaq sanaffiusussaq, ingerlatsinermut aningaasartuutit, imminut akilersinnaassuseq, teknikkikkut naligititaasoq, avatangiisinut sunniutissat, sanaartugassamut titartakkat atuuffissallu, isumaqatigiisummi pineqartumi allanngorartuusinnaasut eqqarsaatigalugit aningaasaqarnikkut iluanaarnarnerpaamik neqerooruteqartumut.

Imm. 2. Tunniussinissamut tunngavissat suut atorneqassanersut neqerooruteqartitsinermi piumasqaatini allanneqassaaq. Aningaasaqarnikkut iluanaarnarnerpaamik neqerooruteqartumut tunniussinissamut tunngavissani neqerooruteqartup tunngavissatut toqqarneqartut qanoq nalilersussanera sapinngisamik allanneqassaaq. Naliliisoqarsinnaanngippat neqerooruteqartup tunngavissat pingaarnerit siulliullugit tullerriaassavai.

Imm. 3. Neqerooruteqartup suliassaq naammaginartumik pitsaassusilimmik, naapertuuttumik qajannaatsumillu, aammalu piffissaq eqqorlugu sularisinnaangikkai ilimanaateqarluinnarpat, neqerooruteqartitsisup neqeroorut itigartissinnaavaa.

Neqeroorutini qinigassat allat

§ 15. Neqerooruteqartitsisup neqeroorutini qinigassanik allanik neqerooruteqartut eqqarsaatigisinnaavaat, neqeroorutini qinigassani allani taakkunani neqerooruteqarnissamut piumasaqaatit minnerpaaffissaat naammassineqarsimappata.

Imm. 2. Neqerooruteqartitsisup neqeroorutit allanik qinigassartallit tiguneqarsinnaannginnerat neqerooruteqartitsinermut piumasaqaatini allassinnaavaa.

Isumaqatiginninniarnarit

§ 16. Suliassap tunniunneqarnissaanut akit minnerpaaffissaat tunngavigineqartussaappat, neqerooruteqartitsisup appasinnerpaamik akeqartitsiniarluni neqerooruteqartoq kisiat isumaqatiginninniarnarfigisinnaavaa.

§ 17. Suliassap tunniunneqarnissaanut neqeroorutip aningaasaqarnikkut iluanaarnarnerpaanissaa tunngavigineqarpat, neqerooruteqartitsisup neqerooruteqartut, sulariumannittussarsiuussinermi tunngavissatut nalilikkat tullerriaakkalluunniit tunngavigalugit aningaasaqarnikkut iluanaarnarnerpaamik neqerooruteqartut pingasut ikinnerusulluunniit isumaqatiginninniarnarfigisinnaavai, neqerooruteqartitsinermi piumasaqaatini tamanna atortussaangitsutut nalunaarutigineqarsimangippat.

Imm. 2. Neqerooruteqartitsisup isumaqatiginninniarnissaq toqqarpagu, suleriaaseq suna malineqassanersoq kingusinnerpaamik neqerooruteqartut toqqarneqartunut, neqerooruteqartitsisup isumaqatiginninniarnarfigissallugit toqqarsimasaanut isumaqatiginninniarnarit aallartinneranni nalunaarutigineqassaaq, tamanna neqerooruteqartitsinermut piumasaqaatini allassimangippat.

Imm. 3. Isumaqatiginninniarnarit ingerlanneqarnerini neqerooruteqartut tamarmik assigiimmik pineqarnissaat neqerooruteqartitsisup qulakkiissavaa. Pingaartumik neqerooruteqartitsisoq paasissutissanik, neqerooruteqartut ilaasa allanit pitsaanagerusumik inissisimalernerinik kinguneqarsinnaasunik tunniussilluni assigiinngisitsissanngilaq. Isumaqatiginninniarnarit nalanni neqerooruteqartut allat aaqqiissutissatut akigititassatulluunniit neqeroorutai pillugit paasissutissat § 13 naapertorlugu tamanut ammasumik saqqummiunneqareersimappata, neqerooruteqartitsisup taamaallaat paasissutissat taakku neqerooruteqartumut tunniussinnaavai.

Imm. 4. Isumaqatiginninniarnarit suliassap annertuumik allangortinneqarneranik, imaluunniit tunniussinissamut, tassungalu ilanngullugit nalilersuinnermut tullerriaarinissamullu tunngavissat, imm. 1 naapertorlugu isumaqatiginninniarnarfissanik toqqaanermi tunngavissatut aalajangersarneqartut allangortinneqarnerannik kinguneqassanngillat.

Kapitali 4

Suliaqartinniakkat ilisimatereerlugit neqerooruteqartitsineq

§ 18. Neqerooruteqartitsisup suliaqartinniakkat pingasut tikillugit ilisimatereerlugit suliassamut ataatsimut neqerooruteqartissinnaavai.

§ 19. Neqerooruteqartitsisut § 1, imm. 2, nr. 1-imi aamma 2-mi sanaartugassanut suliaqartinniakkat ilisimatereerlugit neqerooruteqartitsisinnaangillat, matumani pineqanngippata:

- 1) sanaartugassat katillugit 500.000 koruuninik taakkuluuniit inorlugit naleqartut,
- 2) sanaartugassat aatsaat neqerooruteqartitsinerimi tunngavigisat najoqqutaralugit ajornakusuu-ngaatsiartumik aalajangiiffiqarsinnaasunik annertussuseqartut, pitsaassuseqartut piffissaleneqarsinnaasullu, soorlu misileraanerit, ilisimatusarnerit ineriartortitsinerillu, imaluunniit nutarterinerit, iluarsaassinerit allanngortiterinerillu, imaluunniit suliassat isumannaallisaaneq eqqarsaatigalugu pinngitsoorani suliarineqartussaallutik kinguartinneqarsinnaangitsut,
- 3) suliariumannittussarsiuussinerimi neqeroorutunik naleqquttunik imaluunniit peqqussutit malilugit suliarineqartunik tiguisoqarsimanninnera, imaluunniit aallaqqaammut neqerooruteqartitsinerimi piumasaqaataasut annertuumik allanngortinneqanngippata qinnuteqaatinik tiguisoqarsinnaanginnera,
- 4) suliffeqarfik aalajangersimasoq ataaseq kisimi sanaartugassanik suliaqarnissamut periarfissaqartoq,
- 5) pissutsit immikkut ittut allat pissutaallutik entreprenøri aalajangersimasoq toqqarneqartussaappat. Pissutsit immikkut ittut isigineqartut ilaatigut tassaapput, sanatitsisup sanasussallu suliassamut akigitinneqartussatut isumaqatigiissutaannik sanaartugassanik suliassinneqartup aallarereersimasaanik nangitsineq, aamma illuliat misileraanertallit imaluunniit illuliortarnermik siuarsaanisseq siunertaralugu sanaartornermi annertuumik inerisaanertallit.

§ 20. Neqerooruteqartitsisup suliaqartinniakkat ilisimatereerlugit neqerooruteqartitsinermini suliassap tunniunneqarnissaanut appasinnerpaamik imaluunniit aningaasaqarnikkut iluanaarnerpaamik akeqartitsinissaq tunngavigineqassanersoq nalunaarutigissavaa.

§ 21. Neqerooruteqartup suliassaq naammaginartumik pitsaassusilimmik, naapertuuttumik qajannaatsumillu, aammalu piffissaq eqqorlugu suliarisinnaangikkai ilimanaateqarlunnarpat, neqerooruteqartitsisup neqeroorut itigartissinnaavaa.

Kapitali 5

Isumaqatigiissutit immersugassat

§ 22. Isumaqatigiissutit immersugassat taamaallaat isumaqatigiissuteqartut akornanni pissutsinut toqqaannartumik sunniuteqarsinnaapput. Isumaqatigiissutit immersugassat taamaallaat neqerooruteqartup ataatsip suliffeqarfiullu ataatsip akornanni isumaqatigiissutigineqarsinnaapput. Neqerooruteqartitsisup pisariaqartinneqarpat suliffeqarfik isumaqatigiissusiornissamut atugassamik neqeroorutissaminik ataatsimoortitsinissamik qinnuigisinnaavaa. Tamannali isumaqatigiissusiornermi piumasaqaatit annertuumik allanngortinneqarnerannik kinguneqassanngilaq.

Imm. 2. Isumaqatigiissut immersugassaq sivilunerpaamik ukiuni sisamani atuussinnaavoq.

Kapitali 6

Qinnuteqartunut neqerooruteqartunullu nalunaaruteqartarneq

§ 23. Neqerooruteqartitsisup neqerooruteqartut, suliariumannittussarsiuussinerimi neqerooruteqarsimasut, imaluunniit suliaqartinniakkat ilisimatereerlugit neqeroortinneqarsimasut suliaqartitsinissamik tunniussinissaq eqqarsaatigalugu qanoq aalajangiisoqarsimanera pillugu

sapinngisamik pilertornerpaamik nalunaarfigissavai. Neqerooruteqartitsisup suliariumannit-tussarsiuussinermik taamaatitsinermut imaluunniit suliaqartinniakkat ilisimatereerlugit neqerooruteqartitsisimanermut tunngaviusut saqqummiutissavai.

Imm. 2. Siullermeerutaasumik neqerooruteqartitsinertalimmik killilimmik suliariummannit-tussarsiuussinermi, neqerooruteqartitsisup qinnuteqartut siullermeerutaasumik neqerooruteqarnissamut ilaassanersut sapinngisamik piaarnerpaamik nalunaarfigissavai. Aamma qinnuteqartoqarneratigut neqerooruteqartitsisup qinnuteqartoq ilaatinneqanngitsoq sooq qinnuteqaa-tip itigartinneqarsimaneranut tunngavilersuutigisaminik nalunaarfigissavaa.

Imm. 3. Neqerooruteqartitsisup qinnuigineqarnermini neqeroorutip itigartinneqarneranut tunngaviusoq neqerooruteqartunut § 14, imm. 3 aamma § 21 naapertorlugit nalunaarutigissavaa, tunngavilersuut § 24, imm. 2 naapertorlugu nalunaarutigineqareersimanngippat.

§ 24. Aningaasaqarnikkut iluanaarnerpaamik neqerooruteqarnissaq tunngavigineqarsimappat, aamma imm. 2-4-mi maleruagassat atuutissapput.

Imm. 2. § 17 naapertorlugu isumaqatiginninniarnert aallartinneqarnerinut peqatigitillugu, neqerooruteqartitsisup neqerooruteqartut kalluarneqartut isumaqatiginninniarnernut qaaqquneqartussaanninnerannik aalajangiineq tamatumunngalu tunngavilersuutaasoq pillugu nalunaarfigissavai.

Imm. 3. § 17 naapertorlugu isumaqatiginninniarnert naammassineranni, neqerooruteqartitsisup neqerooruteqartut, neqerooruteqartup isumaqatiginninniarnertissatut piukkussimasani neqeroorummi aalajangiunneqartumi piginnaasat annertuumillu iluaqutissat nalunaarutigissavai.

Imm. 4. § 17 naapertorlugu isumaqatiginninniartoqarsimanngippat, imaluunniit neqeroorutit suliaqartinniakkat ilisimatereerlugit neqerooruteqartitsinikkut pissarsiarineqarsimappata, neqerooruteqartitsisup qinnuteqartoqarneratigut neqerooruteqartunut, neqerooruteqarnissamut piumasqaatinik naammassinnissimasunut, neqeroorummi aalajangiunneqartumi piginnaasat annertuumillu iluaqutissat nalunaarutigissavai.

Kapitali 7

Suliariumannitussarsiuussinerit il.il. pillugit maalaarutit

§ 25. Neqerooruteqartitsisarnermut Maalaaruteqartarfimmik, neqerooruteqartitsinerni maalaarutunik suliaqartartussamik suliaqartarfii arlaannaannulluunniit attuumassuteqanngitsumik Naalackersuisut pilersitsisinnaapput.

Imm. 2. Neqerooruteqartitsisarnermut Maalaaruteqartarfik ataatsimik siulittaasoqassaaq, ataatsimik amerlanerusunilluunniit siulittaasumut sinniisissaqassalluni aammalu sulianut ilisi-maarinnittunik marlunnik ilaasortaqaqassalluni. Neqerooruteqartitsisarnermut Maalaaruteqartarfimmut ilaasortat ukiuni sisamanik atuuttussanngorlutik qinigaqqissinnaatitaallutillu toqqar-neqartassapput.

Imm. 3. Kalaallit Nunaanni Landsdommerip Neqerooruteqartitsisarnermut Maalaaruteqartarfiup siulittaasussaa, aammalu taassuma sinniisissai, inatsisilerinermi atorfilittut soraarum-meersimasussat toqqassavai. Siulittaasup taassumalu sinniisissaata toqqarneqarnerani, sapinngisamik eqqartuussisunut fuldmægtigimik toqqaanermi piginnaanerisassat misilittakkatigullu tunngavissat assingi atorneqassapput. Maalaaruteqartarfimmi ilaasortassat sinneri pingaartu-mik inuit, sanaartornermik ilisimasaqartut akornannit toqqarneqartassapput.

Imm. 4. Kalaallit Nunaanni sanaartornermik suliaqartut inassuteqarnerisigut, Naalackersuisut ilaasortassanik marlunnik toqqaasassapput.

§ 26. Neqerooruteqartitsisarnermut Maalaaruteqartarfik inatsimmi matumani aalajangersakkanik, taakkulu malillugit maleruagassanik unioqutitsinerit pillugit apeqqutinik suliaqartassaaq.

Imm. 2. Neqerooruteqartitsisarnermut Maalaaruteqartarfiup pissutsit imm. 1-imi taaneqartut pillugit maalaarutinut aalajangiineri, sapinngisamik maalaarutip Neqerooruteqartitsisarnermut Maalaaruteqartarfimmut saqqummiunneqarneraniit sapinngisamik kingusinnerpaamik qaamatit pingasut qaangiunnerini pisassapput.

Imm. 3. Naalakkersuisut allatseqarnikkut Neqerooruteqartitsisarnermut Maalaaruteqartarfimmut ikiorsiisassapput, kiisalu Inatsisartuni Naalakkersuisunilu il.il. akissarsiat il.il. pillugit Inatsisartut inatsisaat naapertorlugu Neqerooruteqartitsisarnermut Maalaaruteqartarfiup ilaasortaasa akissarsiaqartinneqarnissaannut maleruagassanik aalajangersaasassallutik.

Imm. 4. Neqerooruteqartitsisarnermut Maalaaruteqartarfik sulinini pillugu ukiumoortumik Naalakkersuisunut nalunaarusiortassaaq.

§ 27. Suliassaq allakkatigut ilanngussanik agguaaqatigiinnikkut piareersarneqartassaaq, tamatumalu kingorna siulittaasoq allamik aalajangiinngippat oqaluinnarluni isumaqatiginninniutigineqartassalluni.

Imm. 2. Neqerooruteqartitsisarnermut Maalaaruteqartarfiup paasissutissat imaluunniit pissutsit Maalaaruteqartarfiup oqarsinnaatitaaffigisaanut ilaasut pillugit aalajangiinerit sulinermi pisariaqartutut isumaqarfigisani tamaasa piumasarisinnaavai.

Imm. 3. Neqerooruteqartitsisarnermut Maalaaruteqartarfiup oqaaseqaateqartinneqareerneratigut maalaaruteqartarfiup suleriaasissaa aammalu maalaaruteqartarfiup sulineranut maleruagassat sukumiisut Naalakkersuisunit aalajangersarneqassapput, taakkunungalugu maalaarutinik tunniussineri sullissinerit akillu, suliap akiata 1 procentianik annertussuseqartut, annerpaamilli 100.000 koruuniusussat, aamma aalajangiinernik tamanut saqqummiussisarnerit ilaapput. Maalaaruteqartoq maalaarumminut taperserneqarpat, imaluunniit suliaq Neqerooruteqartitsisarnermut Maalaaruteqartarfimmi suliarineqarnissaminut naleqqutinngitsutut nalilerneqarluni itigartinneqarpat akiliut utertinneqassaaq.

Imm. 4. Neqerooruteqartitsisarnermut Maalaaruteqartarfiup suliut suliarineqarnerminni 100.000 koruunit inorlugit akeqartut suliarisinnaanngilai.

§ 28. Uku maalaaruteqartarfimmut maalaarumminnik tunniussisinnaapput:

- 1) kikkulluunniit inatsisit tunngavigalugit tamatumunnga soqutiginnittut,
- 2) Unammilleqatigiinnermut Ataatsimiititaliaq, kiisalu
- 3) kattuffiit pisortanilu oqartussaasut, Naalakkersuisut maalaaruteqarnissamut akuerisaat.

Imm. 2. Maalaaruteqartarfiup inuk alla imaluunniit pisortani oqartussaasoq, suliamut anner-tuumik pingaaruteqartoq, suliakkiisumut maalaarutigineqartumut iluaqutaasinnaasoq suliame suleqataanissaanut akuerisinnaavaa.

Imm. 3. Kingusinnerpaamik maalaarutip maalaaruteqartarfimmut tunniunneqarneranut peqatigitillugu, maalaaruteqartoq suliakkiisumut unioqutitsinerimut patsisigineqartoq, aammalu maalaarutip maalaaruteqartarfimmut tunniunneqarsimanera pillugu allakkatigut ilisimatissavaa.

§ 29. Maalaaruteqartarfiup suliaq itigartissinnaavaa, imaluunniit pissutsit tunngaviusut tunngavigalugit tamakkiisumik ilaannaasumilluunniit aalajangiiffigisinnaallugu.

Imm. 2. Maalaarut taamaallaat inatsimmi aalajangersarneqartut tunngavigalugit atuuttussaa-tinneqarsinnaavoq. Taamaattorli pissutsit immikkut itsillugit maalaaruteqartarfiup imaluunniit maalaaruteqartarfik sinnerlugu siulittaasup maalaarut atuuttussanngortissinnaavaa.

Imm. 3. Maalaaruteqartoq maalaarummi eqqartuussivimmut suliakkiissutigisamini tamakkiisumik ilaannaasumilluunniit taperserneqarsimatillugu, pissutaasut tunngavigalugit eqqar-

tuussiviup suliakkiisoq maalaaruteqartup maleruagassanik inatsimmi matumani taaneqartunik, aammalu maleruagassanik taanna tunngavigalugu suliarineqarsimasunik unioqqutitsinerup kingunerisaanik annaasaanut taarsiisussanngortissinnaavaa.

§ 30. Maalaaruteqartoq maalaarummi maalaaruteqartarfimmut tunniussamini tamakkiisumik ilaannaasumilluunniit taperserpeqarpat, maalaaruteqartarfiup suliakkiisoq maalaaruteqartup maalaarummi suliamut atatillugu aningaasartuutigisimasaanut akileeqqullugu piumaffigisinnaavaa.

§ 31. Maalaaruteqartarfiup aalajangiineri allaffissornermi oqartussaasumut allamut ingerlateqqinneqarsinnaanngillat.

Imm. 2. Maalaaruteqartarfiup aalajangiinerinut atatillugu aalajangiinerup pineqartumut nalunaarutigineqarnerata kingorna, kingusinnerpaamik sapaatit akunnerisa arfineq pingasut qaangiunnerini eqqartuussivinnut suliakkiissutigineqarsinnaapput. Piffissarititaasup iluani suliakkiisoqanngippat, maalaaruteqartarfiup aalajangiineri inaarutaasumik aalajangiinerussapput.

§ 32. Piaaraluni imaluunniit mianersuaalliorujussuarluni paasissutissanik eqqunngitsunik paatsoortitsisinnaasunilluunniit Neqerooruteqartitsinermi Maalaaruteqartarfimmut tunniussisoq, imaluunniit paasissutissanik suliamut pineqartumut pingaarutilinnik nipangiussisoq, imaluunniit § 29, imm. 1 imaluunniit 2 naapertorlugu Neqerooruteqartitsinermi Maalaaruteqartarfiup inerteqqutaanik peqqussutaanilluunniit naammassinninngitsoq akiliisussanngortinneqarsinnaavoq.

Imm. 2. Unioqqutitsisoq suliffeqarfiuppat tamakkiisumik ilaannaasumilluunniit naalagaaffimmit, Namminersorerullutik Oqartussanit, kommunimit imaluunniit kommunit suleqatigiiffiannit, kommunalbestyrelsit nunaqarfinnilu aqutsisut pillugit Inatsisartut inatsisaanni § 64-imi ilaatinneqartumit, aktiaatileqatigiiffimmit, anpartsselskabimit, andelselskabimit assigisaannilluunniit pigineqartoq, suliffeqarfik il.il. tassunga akisussaatinneqarsinnaavoq. Taamatuttaaq unioqqutitsineq Namminersorerullutik Oqartussanit, kommunimit imaluunniit kommunit suleqatigiiffiannit, kommunalbestyrelsit nunaqarfinnilu aqutsisut pillugit Inatsisartut inatsisaanni § 64-imi ilaatinneqartumit piliarineqarpat tamanna atuutissaaq.

§ 33. § 27, imm. 2 naapertorlugu paasissutissanik Neqerooruteqartitsinermi Maalaaruteqartarfimmut tunniussinngitsoortoqarpat, maalaaruteqartarfik pineqartut ullormoortumik akiliisussanngortitsinerisigut pinngitsaaliisummik akiliisissinnaavai, taakkulu akiligassallip pigisaanik qlarnaveeqquusiititsinikkut pisinnaavoq.

Kapitali 8

Ilinniartut

§ 34. Sanaartukkat § 1, imm. 2, nr. 1-imi aamma 2-mi pineqartut suliarineqarnerinut atatillugu ilinniartut qanoq amerlatigisut atorfinitsinneqartarnissaannik Naalakkersuisut maleruagassiorsinnaapput.

Atortuulersinneqarfia il.il.

§ 35. Inatsit 1. maj 2009-mi atuutilerpoq, piffissamillu tassanngaanniit suliasaanut neqerooruteqartitsivigineqartunut atuutilerluni.

Imm. 2. Tamatuma peqatigisaanik suliariumannittussarsiuussisarnermut il.il. Inatsisartut inatsisaat nr. 3, 6. april 1992-imeerso atorunnaarsinneqarpoq.

Imm. 3. Illuliassanut sanaartugassanullu neqeroortitsisarneq pillugu Namminersornerullutik Oqartussat nalunaarutaat nr. 15, 5. juli 2007-imeersoq atorunnaarsinneqarpoq, taamaallaat § 1, atuneq aamma § 12, taarserneqarnissamik imaluunniit Inatsisartut inatsisaat manna naapertorlugu maleruagassanik aalajangersaanikkut atorunnaarsinneqarnissamik tungaanut atuuttussat pinnatik.

§ 36. Pituffimmi sakkutooqarfik inatsimmi matumani aalajangersakkanut ilaatinneqanngilaq.

Namminersornerullutik Oqartussat, den xx xx 2008

Hans Enoksen

/

Kim Kielsen